



泰山，為問消息而相報。」至後月，長史來報云：「是君鄉人趙某，為泰山主簿。主簿一員缺，薦君為此官，故為文案，經紀召君耳。案成者當死。」仁茜問計將安出，景云：「君壽應年六十餘，今始四十。但以趙主簿橫徵召耳，當為請之。」乃曰：「趙主簿相問，睦兄昔與同學，恩情深至。今幸得為泰山主簿。適遇一員官缺，明府令擇人，吾已啟公。公許相用。兄既不得長生，命當有死。死遇濟會，未必當官。何惜一二十年苟生耶？今文案已出，不可復止。願決作來意，無所疑也。」仁茜憂懼，病癒篤。景謂仁茜曰：「趙主簿必欲致君，君可自往泰山，於府君陳述，則可以免。」仁茜問何由見府君。景曰：「往泰山廟東，度一小嶺，平地是其都所。君（君原作居。據明抄本改。）往，自當見之。」仁茜以告文本，文本為具行裝。數日，又告仁茜曰：「文書欲成，君訴懼不可免。急作一佛像，彼文書自消。」告文本，以三千錢為畫一座像於寺西壁。訖而景來告曰：「免矣。」仁茜情不信佛，意尚疑之，因問景云：「佛法說有三世因果，此為虛實？」答曰：「皆實。」仁茜曰：「即如是，人死當分入六道，那得盡為鬼？而趙武靈王及君，今尚為鬼耶？」景曰：「君縣內幾戶？」仁茜曰：「萬餘戶。」又曰：「獄囚幾人？」仁茜曰：「常二十人已下。」又曰：「萬戶之內，有五品官幾人？」仁茜曰：「無。」又曰：「九品以上官幾人？」仁茜曰：「數十人。」景曰：「六道之義分，一如此耳。其得天道，萬無一人，如君縣內無一五品官；得人道者，萬有數人，如君縣內九品數十人；入地獄者，萬亦數十，如君獄內囚；唯鬼及畜生，最為多也，如君縣內課役戶。就此道中，又有等級。」因指其從者曰：「彼人大不如我，其不及彼者尤多。」仁茜曰：「鬼有死乎？」曰：「然。」仁茜曰：「死入何道？」答曰：「不知，如人知生而不知死。」仁茜問曰：「道家章醮，為有益否？」景曰：「道者彼天帝總統六道，是為天曹。閻羅王者，如人間天子。泰山府君，如尚書令錄。五道神如諸尚書。若我輩國，如大州郡。每人間事，道士上章請福，如求神之恩。大曹受之。下閻羅王云：以某月日，得某申訴云。宜盡理，忽令枉濫。閻羅敬受而奉行之，如人奉詔也。無理不可求免，有枉必當得申，何為無益也？」仁茜又問：「佛家修福何如？」景曰：「佛是大聖，無文書行下。其修福者，天神敬奉，多得寬宥。若福厚者，雖有惡道，文簿不得追攝。此非吾所識，亦莫知其所以然。」言畢即去。仁茜一二日能起，便愈。文本父卒，還鄉里。仁茜寄書曰：「鬼神定是貪諂，往日欲郎君飲食，乃爾慙慙。比知無復利，相見殊落漠。然常掌事猶見隨。本縣為賊所陷，死亡略盡。僕為掌事所導，故（故原作如常。據明抄本改。）賊不見，竟以獲全。」貞觀十六年九月八日文官賜射於玄武門，文本時為中書侍郎。自語人云爾。（出《冥報錄》）

#### 兗州人

唐兗州鄒縣人姓張，忘字。曾任縣尉。貞觀十六年，欲詣京赴選。途經泰山，謁廟祈福。廟中府君及夫人並諸子等，皆現形像。張遍拜訖，至第四子旁，見其儀容秀美。同行五人，張獨祝曰：「但得四朗交遊，賦詩舉酒，一生分畢，何用仕官？」及行數里，忽有數十騎馬，揮鞭而至，從者雲是四郎。曰：「向見兄垂顧，故來仰謁。」又曰：「承欲選，然今歲不合得官。復恐在途有災，不復須去也。」張不從，執別而去。行百餘里，張及同伴夜行，被賊劫掠，裝具並盡。張遂祝曰：「四郎豈不相助？」有頃，四郎車騎畢至，驚嗟良久。即令左右追捕。其賊顛仆迷惑，卻來本所。四郎命決杖數十。其賊臂膊皆爛。已而別去。四郎指一大樹，兄還之日，於此相呼也。是年，張果不得官而歸。至本期處，大呼四郎。俄而郎至。乃引張雲，相隨過宅。即有飛樓綺觀，架迴凌空，侍衛嚴峻，有同王者。張即入。四郎云：「須參府君，始可安。」乃引入。經十餘重門，趨而進，至大堂下謁拜。見府君絕偉。張戰懼，不敢仰視。判事似用朱書，字皆極大。府君命使者宣曰：「汝乃能與吾兒交遊，深為善道。宜停一二日？聚，隨便好去。」即令引出，至一別館。盛設珍羞，海陸畢備。奏樂盈耳。即與四郎同室而寢。已經三宿。張至明旦，遊戲庭序，徘徊往來，遂窺一院，正見其妻。於眾官人前荷枷而立。張還，甚不悅。四郎怪問其故。張具言之。四郎大驚云：「不知嫂來此也。」即自往造諸司法所。其類乃有數十人，見四郎來，咸去下陞，重足而立。以手招一司法近前，具言此事。司法報曰：「不敢違命。然須白錄事知。」遂召錄事，錄事諾云：「乃須夾此案於眾案之中，方便同判，始可得耳。」司法乃斷云：「此婦女勸別案內。常有寫經持齋功德，不合即死。」遂放令歸家。與四郎涕泣而別，仍云：「唯作功德，可以益壽。」張乘本馬，其妻從四郎借馬，與妻同歸。妻雖精魂，事同平素。行欲至家，可百步許，忽不見。張大怪懼。走至家中，即逢男女號哭，又知已殯。張即呼兒女，急往發之，開棺，妻忽起即坐，軼然笑曰：「為憶男女，勿怪先行。」於是已死經六七日而蘇也。兗州人說之云爾。（出《冥報錄》）

[返回 >> 太平廣記 >>](#)

[上一篇](#) [下一篇](#) 本書來源：[開放文學網站](#)